

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO

Rukovodstvu Skupštine Kantona Sarajevo,
Premijeru Vlade KS,
Ministru komunalne privrede, infrastrukture, prostornog uređenja, građenja i zaštite
okoliša, odnosno komandantu Štaba Civilne zaštite KS,
Ministru unutrašnjih poslova KS,
Direktoru CZ KS,
opštinama u KS.

Poslanička inicijativa:

U skladu sa članom 106. i 213. Poslovnika Skupštine Kantona Sarajevo („Sl. Novine KS“, broj:41/12 - Drugi novi pročišćeni tekst, 15/13, 47/13, 47/15, 48/16, 09/20, 14/20, 16/22, 17/22 – ispravka i 47/24) dostavljam poslaničku inicijativu prema u zaglavlju nabrojanim institucijama, te molim očitovanje Kolegija SKS i Vlade KS.

Iniciram hitan sastanak Štaba Civilne zaštite KS i delegiram temu: Formiranje radne grupe za izradu smjernica, u kojoj bi sudjelovali relevantni subjekti (predstavnici opštinskih i kantonalne službe civilne zaštite, predstavnik Uprave za inspekcijske poslove, predstavnik relevantne inspekcijske službe Ministarstva unutrašnjih poslova KS za nadzor protivpožarnog sistema u KS, i drugi subjekti po prijedlogu Vlade KS a prije svih Premijera i Ministra koji je po funkciji i komandant Štaba CZ KS), a na osnovu kojih bi se jasno odredile nadležnosti, odgovornost i prava svih subjekata unutar sigurnosnog sistema KS, te uputila naredba za izvršenje hitne analize stanja protivpožarnog sistema u KS, kako u smislu materijalno-tehničkih sredstava tako i u smislu stvarne efektivnosti aktuelnog zakonodavstva u tom kontekstu.

Obrazloženje:

Nakon nedavnog požara u ustanovi socijalne zaštite u TK, čije su nas tragične posljedice morale podsjetiti na požar koji se u Domu Bjelave desio 2007.god., kao osobe koje obavljaju javne funkcije u KS danas bismo trebali biti još svjesniji važnosti preventivnog djelovanja, odnosno izgradnje funkcionalnog sistema protivpožarne zaštite u KS, kako unutar javnih ustanova čiji je osnivač KS, tako i u KS generalno – u svim objektima kolektivnog stanovanja, te unutar infrastrukturnog sistema hidrantske i mreže protivpožarnih puteva na cjelokupnom području KS.

Čak i kroz jednostavno istraživanje, možemo zaključiti da postoji protivriječnost između formalnosti i funkcionalnosti – odnosno da je vrlo moguće da su relevantne inspeksijske kontrole ustanovile formalno zadovoljenje sigurnosnih zahtjeva, dok cijeli sistem još uvijek nije funkcionalan. Veliki je broj javnih objekata u kojima nije vršen redovan i kvalitetan nadzor, odnosno u kojima nije ustanovljeno realno stanje koje bi imperativno uzrokovalo hitnu reakciju institucija KS. Kao primjer ću navesti samo dvije socijalne ustanove, Mjedenicu i Nahorevo, koje iz različitih razloga nemaju obezbijeđene protivpožarne stepenice (Iracionalno je da zbog Odluke o historijskom urbanom krajoliku, tzv. HUK-u, nije moguće postaviti protivpožarne stepenice npr. u Zavodu za specijalno obrazovanje i odgoj djece Mjedenica, ili da to zbog imovinsko-pravnih odnosa nije moguće uraditi u Domu za socijalno i zdravstveno zbrinjavanje osoba sa invaliditetom i drugih osoba – Nahorevo.).

Potrebno je prioritarno izvršiti realnu analizu stanja unutar ustanova koje se bave ranjivim društvenim grupama (socijalne ustanove, domovi, škole, bolnice, i sl.), zatim ustanova unutar kojih se organizuju javni skupovi (stadioni, muzeji, pozorišta, dvorane, vjerski objekti, i sl.). Uporedo s ovim aktivnostima kantonalnih institucija, sve opštine u KS bi morale izvršiti realnu analizu sigurnosne infrastrukture na svom području (stanje hidrantske mreže, protivpožarnih aparata, mlaznica, kutnih ventila sa spojka, hidrantskih ormarića, protivpožarnih stepenica, protivpožarnih puteva, itd.). Odgovorno tvrdim da u svim opštinama KS postoji veliki broj objekata kolektivnog stanovanja u kojima taj sistem nije redovno ažuriran (finansijska nemogućnost upravitelja, etažnih vlasnika i sl., iako je to njihova zakonska obaveza, te vrlo rijetki pozitivni primjeri kada opštinske službe civilne zaštite izvrše nabavku i znavljanje spomenutih materijalno-tehničkih sredstava, jer im to nije propisano kao jasna zakonska obaveza). Najveći broj regulacionim planovima predviđenih protivpožarnih puteva uzurpiran je od strane građana koji su nauštrb postojanja tih prolaza za vatrogasna vozila proširili svoja dvorišta, bašte ili parkinge, o čemu se vrlo rijetko vodi računa u jedinicama lokalne samouprave unutar KS.

Zbog nejasno propisanih nadležnosti, da zaključim, nejasne su i odgovornosti i prava, te otežani nadzor i kontrola cjelokupnog sistema u KS. Ulaganja u nabavku potrebnih materijalno-tehničkih sredstava bila bi znatno olakšana ukoliko bismo prilagodbom zakonske regulative omogućili značajnija finansijska ulaganja u sistem od strane kantonalne i opštinskih službi civilne zaštite. Veliki požar na zgradi Vjesnika, u Zagrebu, kada su vatrogasna vozila gasila požar na 12. ili 13. spratu, treba nas podsjetiti da u KS ne posjedujemo vozilo sa opremom koja bi omogućila gašenje požara na zgradama spratnosti više od osam spratova, iako u različitim dijelovima KS postoje toliko visoke zgrade.

Sarajevo, 18.11.2025. godine

Samir Avdić,
Klub poslanika SDP-a BiH u KS